



Cussegl da vischnaunca 2021/2024

Protocol no. 27

Seduta dils 07-12-2023

Protocol

**dalla seduta dil cussegl da vischnaunca,
gievgia, ils 7 da december 2023, allas 18⁰⁰ – 19⁴⁰
Liug: Sala Peter Kaiser, Claustra Mustér**

Presidenta: Helga Probst-Linder

Actuara: Ursina Murer-Fatzer

Presents:

- a) Cussegl
- | | |
|-----------------------|----------------------|
| Armin Berther | Mario Flepp |
| Theres Burri Gadola | Otmar Flepp |
| Silvia Bucheli-Caduff | Larissa Fry Schuster |
| Roland Cajacob | Remo Huonder |
| Adrian Deflorin | Giusep Lozza |
| Edgar Durschei | Armin Manetsch |
| Adrian Flepp | Ignaz Venzin |
- b) Suprastonza
communala
- | | |
|-----------------|---------------------|
| René Epp | Jris Lombris |
| Clemens Berther | Paul Flurin Schmidt |
- Perstgisa:*
- Wendelin Jacomet
- c) Canzlist
- Andri Hendry
- d) Cumissiun da
gestiun
- Sonia Lutz-Schmidt, *presidenta dalla cumissiun da gestiun*
Curdin Cajacob
Flavio Murer
- e) Hosps
- siat

Plaid d'avertura dalla presidenta

Preziai presents

Avon biebein 11 meins haiel jeu astgau surprender la honorifica scharscha dalla presidenta dil cussegl da vischnaunca e cun quest cussegl termineschel jeu sco tgamun da nossas sedutas da cussegl. En tut havein nus teniu otg cussegls. Sper quei temps ha mintgin da nus segirefranc investau sil pli pauc aunc inagada tontas uras duront siu temps liber per sepreparar sin las sedutas da cussegl. Persuenter admettel a vus tuts, preziadas concusseglieras e preziai concusseglers, in cordial engraziament per vies grond engaschi en favur da nossa vischnaunca.

Jeu havevel dabia respect da quella carica, cunzun dil menar las sedutas e da reagir correctamein sin eventualitads nunprevedidas. Jeu constateschel denton che vus haveis schanegiau mei da talas eventualitads. Igl ei stau per mei in fetg interessant onn presidial.

Cun quellas lingias termineschel jeu miu davos plaid sco presidenta dil cussegl da vischnaunca. Jeu engraziel a vus tuts, cunzun era a mes premurai collegas dil biro da cussegl, per vies sustegn, las bunas discussiuns e per vies grond engaschi.

Mortoris

Dapi la davosa seduta dil cussegl da vischnaunca ha ei dau quater mortoris:

- Gérard Kiener-Flepp, naschius ils 15-05-1937 e morts ils 23-11-2023
- Maria Therese Schmed, naschida ils 24-09-1942 e morta ils 24-11-2023
- Angelo Di Nolfi, naschius ils 19-11-1938 e morts ils 30-11-2023
- Pader Urban Affentranger, naschius ils 18-03-1944 e morts ils 03-12-2023

Naschientschas

Dapi nossa davosa seduta dil cussegl da vischnaunca ha ei dau duas naschientschas.

- Tomâs Faria de Sa, naschius ils 14-11-2023, fegl da Helena Isabel Moreira de Faria e Bruno Filipe Pereira de Sa
- Duarte Fernandes Mestre, naschius ils 17-11-2023, fegl dad Inês Alexandra Guerreiro Fernandes Mestre ed Alex Martins Mestre

Cussegliaer Edgar Durschei giavischa in'amplificaziun dalla gliesta da tractandas. La proposta secloma sco suonda;

3. Instrarad ina cumissiun parlamentara en connex cun las abdicaziuns dils commembers dalla cumissiun da baghegiar sco era dil menader digl uffeci da baghegiar.

Decisiun

Il cussegl approbescha cun 13 encunter 1 abstenziun la proposta da concussegliaer Edgar Durschei e cheutras era la nova gliesta da tractandas che senumna sco suonda;

Tractandas:

1. Protocol 26-2021/2024
2. Pendicularas Mustér SA: Contract da dretg da baghegiar e da servitud (messadi 44-2021/2024)
3. **Cumissiun parlamentara en causa cumissiun e cau digl uffeci da baghegiar**
4. Agenda 2024 (messadi 45-2021/2024)
5. Ura da damondas (conform ad art. 44 dil regulativ da fatschentas)
6. Elecziuns:
 - 6.1 dil president ni dalla presidenta dil cussegl da vischnaunca per 2024
 - 6.2 dil vicepresidente ni dalla vicepresidente dil cussegl da vischnaunca per 2024

Remarca

*Muort absenza da cusseglier Armin Manetsch eran tier quella decisiun 14 cussegliers presents.
Preschientscha da cusseglier Armin Manetsch naven da tractanda dus (15 cussegliers).*

Cussegl da vischnaunca Disentis/Mustér
La presidenta: L'actuara:

Helga Probst-Linder

Ursina Murer-Fatzer



Cussegl da vischnaunca 2021/2024

Protocol no. 27

Seduta dils 07-12-2023

1. Protocol 26-2021/2024

La suprastanza communal supplichescha da rectificar la votaziun e decisiun en connex cun la fixaziun dil pei da taglia 2024. Pertucca las paginas 10 e 12 dil protocol nr. 26 dalla seduta dils 14 da november 2023.

Il vicepresidente dil cussegl da vischnaunca Ignaz Venzin conferma che la votaziun e decisiun dil sbassament dil pei da taglia da 110% sin 99% ei succedida sut tractanda 2, pagina 10. Il cussegl ha approbau cun 8 encunter 7 vuschs la proposta da concussegliaer Edgar Durschei. Cheutras ha il cussegl refusau la proposta dalla suprastanza communal.

Ella decisiun finala sin pagina 12 vegn cheutras mo menziunau las propostas 1 e 3 dalla suprastanza communal. Quellas ha il cussegl approbau unanimamein.

Decisiun:

Il protocol nr. 26 dalla seduta dils 14 da november 2023 vegn approbaus unanimamein cun risguardar las correcturas en blau sco era sura rectificaziun.

Cussegl da vischnaunca Disentis/Mustér

La presidenta:

L'actuara:

Helga Probst-Linder

Ursina Murer-Fatzer



Cussegl da vischnaunca 2021/2024

Protocol no. 27

Seduta dils 07-12-2023

2. Pendicularas Mustér SA: Contract da dretg da baghegiar e da servitud (messadi 44-2021/2024)

Presentaziun

Suprastonza:

President communal René Epp:

Igl onn 2022 ei vegniu decidu dalla suprastonza communal da surpender dalla Repower AG l'ovra solara Desertasol a Caischavedra e da perseguitar vinavon quei project en collaboraziun cun las Pendicularas Mustér SA. Igl intent ei che las Pendicularas san utilisar l'energia da quell'ovra per agen diever. L'ovra Desertasol preveda ina prestaziun da rodund 912'000 kWh e cheutras basegna ei ina procedura da baghegiar tenor dretg ordinari. Cheutras ha il cussegl da vischnaunca da decider davart il contract da dretg da baghegiar el senn digl art. 36 lit. f dalla constituziun communal.

La vischnaunca sa quintar tier ina producziun da rodund 912'000 kWh cun entradas da frs. 633'669.-- enteifer in cuoz da 30 onns (*pauschala annuala frs. 12'000.-- e 1 rp./kWh ca. frs. 9'122.30, total frs. 21'122.30*)

Ei vegn giavischau negina debatta d'entrada. Ei succeda la discussiun detagl.

Cussegl:

Ei la sorprendida dall'ovra vegnida indemnisada?

President communal René Epp:

La vischnaunca ha surpriu l'ovra dalla Repower AG per ina summa da frs. 5'000.--. Las Pendicularas Mustér SA surpandan l'ovra existenta el dretg da baghegiar.

Decisiun

Sin fundament dallas discussiuns e decisiuns suranumnadas approbescha il cussegl da vischnaunca unanimamein;

- 1. el senn digl art. 36 lit. f dalla constituziun communal il contract da dretg da baghegiar e da servitud cun las Pendicularas Mustér SA davart la realisaziun d'ina ovra solara a Caischavedra;**
- 2. da suttametter quei conclus el senn dallas prescripziuns digl art. 21 lit. d dalla constituziun communal al referendum facultativ.**

Cussegl da vischnaunca Disentis/Mustér
La presidenta: L'actuara:

Helga Probst-Linder

Ursina Murer-Fatzer



3. Cumissiun parlamentara en caussa cumissiun e cau digl uffeci da baghegiar

Sin las treis damondas ord il ravugl dil cussegl da vischnaunca che la presidenta dil cussegl ha inoltrau avon la seduta al president communal pren René Epp suandontamein posiziun:

Co ha ei saviu vegnir aschi lunsch che schibein il menader digl uffeci da baghegiar sco era l'entira cumissiun da baghegiar han demissiunau resp. abdicau?

La cumissiun da baghegiar fa attents en siu scriver ch'ins seigi gia vegni ensemen inagada igl avrel 2022 cun la suprastanza communal per discussiunar davart sias ideas e propostas. Quellas ponderaziuns ein cunzun stadas en connex cun simplificar las proceduras e davart las structuras communalas sco era quellas d'informaziun. La cumissiun fa attents ch'il scriver e la sentupada hagi giu negin'influenza. Cheu eisi da renviar claramain allas structuras politicas actualas. Actualmein ei stipulau ella constituziun communal sut art. 57 che l'organisaziun, l'incarica e las cumpetenzas dalla cumissiun da baghegiar sedrezzan tenor la lescha da baghegiar. Tenor la lescha da baghegiar art. 7 al. 2 vegn scret che la cumissiun da baghegiar prepara e propona las fatschentas per mauns dall'istanza da baghegiar. L'istanza da baghegiar ei tenor art. 6 dalla lescha da baghegiar la suprastanza communal. Per midar quellas structuras drova ei ina revisiun dalla constituziun communal. La suprastanza communal ha a vesta dil discuors bein fatg sias ponderaziuns, denton buca vegnida tier la conclusiun da gest instradar ina revisiun dalla constituziun communal. Ina revisiun dalla constituziun communal munta numnadamein dad insumma reponderar las structuras politicas en vischnaunca ed ei aschia cumbinada cun bia lavur. Tonaton ha la suprastanza a caschun da sias sedutas adina puspei giu endamen davart ina revisiun parziala dalla constituziun communal. Aschia ed en vesta dils pensiunaments da divers collaboraturs el sector digl uffeci d'infrastructura e baghegiar ha la suprastanza decidiu d'instradar ensemen cun la firma Curia - che cusseggia nus medemamein davart il project IKS - il project "Weiterentwicklung Gemeindeorganisation". Cheu citeschel ord l'incarica:

- *Die Gemeinde Disentis auf bevorstehende, wichtige Pensionierungen vorbereiten (Zuständigkeitsbereiche definieren, Stellenbeschriebe, Stellvertretungen, Know-How sichern, Stellenausschreibung, etc.)*
- *Effizienzsteigerung in den Prozessen und Sicherstellen der Durchgängigkeit der Informationen (u.a. Schnittstellenregelung zwischen Gemeindeverwaltung / operative Ebene / politische Ebene / IKS)*
- *Durch effiziente und kundenorientierte Prozesse, positive Wahrnehmung der Gemeindeverwaltung bei den Kunden (Prozessabläufe / Digitalisierung)*
- *Die Mitarbeitenden identifizieren sich mit den Strukturen und mit der Organisation (Funktionsdiagramm inkl. Stellvertretungen / Prozessabläufe)*
- *Die Gemeinde Disentis wird als fortschrittlich und kundenorientiert wahrgenommen.*
- *Überprüfung der politischen Gemeindeorganisation, politischen Strukturen (Gemeindeverfassung, schlanke Strukturen)*

Il start dil project ei vegnius daus ils 10 da november 2023. Ils resultats duein vegnir evaluai egl emprem quartal 2024. A vesta dils resultats vegn la suprastanza a decider co vinavon.

Plinavon s'entaupa il menader infrastructura e baghegiar, il cau da baghegiar, il gerau responsabel ed il president communal jamnilmein per haver endamen davart las fatschentas ch'ei cunzun empau pli delicatas ni dispoteivlas. Cheutras duei vegnir evitau che l'informaziun

flessegia buca denter ils responsabels e per che tuts seigien da tut temps adina sil medem stan. Quella s'entupada ei secumprovada e quei grazia agl input dalla cumissiun da baghegiar a caschun da quei scriver. Dapli lu ein bein entginas fatschentas vegnidas tractadas – e quei mintgamai cuort e bein – a caschun da quella sentupada. Pia ein da tut temps tuts cumpigliai adina stai informai davart las fatschentas ch'ins ha giu endamen.

Che entginas fatschentas ni projects dispiteivels han dau discussiun, gliez ei tuttavia legitim, endretg ed impurtont. Aschia sa ei naturalmein era capitar che l'istanza da baghegiar, resp. la suprastanza communal, ha decidiu auter che la proposta e preparaziun dalla cumissiun da baghegiar. Era quei ei legitim. Tonaton ha ina tala decisiun ni intervenziun da far nuot cun metter en damonda la cumpetenzza dalla cumissiun da baghegiar ni da buca schazegiar la buna lavur che vegn exequida dallas persunas ella cumissiun.

L'activitad da baghegiar en nossa vischnaunca ei fetg gronda, cunzun ils davos onns. Esser el focus denter vischinas e vischins, las spetgas dalla politica e la lescha ei buca adina sempel ed emperneivel. Era per la suprastanza communal eisi buca adina sempel da stuer prender certas decisiuns ch'eran forsa buca adina d'engrau alla cumissiun da baghegiar. Denton ha la suprastanza communal da tut temps agiu correct ed en tut sias decisiuns adina priu la decisiun ch'ei la megliera per la vischnaunca ed il client, resp. per sias vischinas ed ils vischins. Adina en sia cumpetenzza e responsabladad.

A vesta dil suranumnau sa la suprastanza communal cun buna cunscienza comunicar ch'ella ei adina e da tut temps setenida conform alla lescha.

Co va ei vinavon, sche quels posts san buca vegnir occupai enteifer in temps nizeivel?

La suprastanza communal ha decidiu a caschun d'ina seduta extraordinaria quest gliendisdis da scriver ora la piazza aunc quest'jamna e da publicar las demissiuns dallas persunas dalla cumissiun da baghegiar e l'abdicaziun dil cau digl uffeci da baghegiar. Entochen miez schaner 2024 vegn dau la pusseivladad a tuttas e tuts interessents da s'annunziar tier l'administraziun per la cumissiun da baghegiar cun la finamira ch'il cussegl da vischnaunca sappi eleger ils novs commembers dalla cumissiun da baghegiar a caschun da sia seduta dil fevrer 2024. Era vegn la suprastanza communal activamein ad encurir persunas che savessen haver interess per ina tala cumissiun.

Medemamein havein nus giu contact cun igl uffeci da vischnauncas dil cantun Grischun. Cunquei che la cumissiun da baghegiar ei ina cumissiun preparatoria e buca l'istanza da baghegiar, vegnin nus a s'organisar internamein – entochen che la nova cumissiun da baghegiar ei eligida – aschi adequat sco pusseivel per buca retardar lubientschas ni autras fatschentas. Las decisiuns davart lubientschas san vinavon vegnir pridas dalla suprastanza communal. En cass d'agid sa duront quei temps era vegnir tratg neutier cussegladers ni autras tiarzas persunas. La suprastanza communal ei interessada d'occupar ton pli spert il post dil cau da baghegiar sco era la cumissiun da baghegiar.

Ei ha giu num dalla cumissiun da baghegiar ch'il cussegl da vischnaunca hagi da survegnir ina brev, daco han ins buca survegniu investa da quella?

Correspondenza interna confidenziala vegn la suprastanza communal mai a tarmetter alla publicitad. Aschispert sco la corrispondenza arriva tier il cussegl da vischnaunca, seigi quei messadis ni auters documents, ein quels aviarts per la publicitad. Tenor art. 28 dalla costituziun communal ein aschibein la suprastanza communal, cumissiuns sco era emploiai communal obligai da setener vid il secret d'uffeci. Consequentamein ha la suprastanza communal sulettamein tarmess la brev alla cumissiun da gestiun, nies organ da controlla ed als responsabels dalla vart operativa. Oz pia vegn il cussegl da vischnaunca informaus davart ils schabetgs dils davos dis.

La suprastanza communal deplorescha la demissiun dils commembers dalla cumissiun. Nus acceptein denton quella decisiun ed encurin ton pli spert novs commembers. Il process pils proxims pass per anflar interessai ei pia gia vegnius mess sin via. Al cussegl da vischnaunca engraziein nus per sia fidonza els gremis executivs.

Cussegl:

Sebasond sin art. 36 dalla constituziun communal ei il cussegl da vischnaunca la suprema istanza che survigilescha l'administraziun communal. Cheutras ha il cussegl la pusseivladad dad eleger ina cumissiun parlamentara per sclarir ils motivs per la demissiun en globo dils commembers dalla cumissiun da baghegiar sco era dil menader digl uffeci da baghegiar. Il cussegl giavischa ch'il cass vegni sclarius objectivamein. Igl ei d'analisar sche las estructuras vertentas ein aunc adequatas al temps ni sch'ei basegna eventualmein midadas per saver garantir ina buna collaboraziun denter las personas involvidas.

Vegnan las proceduras da baghegiar resp. la lavur dil mintgadi retardadas cun instradas ina cumissiun parlamentara?

Proposta

Cussegliaer Edgar Durschei propona d'eleger ina cumissiun parlamentara per intercurir e rapportar il fatg per mauns dil cussegl da vischnaunca.

President communal René Epp:

Igl ei buc el senn dalla suprastonza communal da vuler instradar ina cumissiun parlamentara en caussa, cun quei che la cumissiun da gestiun ei igl organ da controlla. La cumissiun da gestiun sefatschenta gia cun la tematica. Plinavon ha la suprastonza communal incaricau la fatschenta Curia che s'occupescha gia cun las estructuras communalas.

Gerau Clemens Berther:

Gest vuler instradar ina cumissiun parlamentara ei ferm tubac. Igl ei pli prudent d'incaricar la cumissiun da gestiun en caussa, per quei lezza ha gia investa en ils fatgs communalas. Vuler instradar ina cumissiun parlamentara ei gest era in signal ch'il cussegl ha negina fidonza en la cumissiun da gestiun e suprastonza communal.

Cussegl:

Il cussegl giavischa da dar il plaid alla cumissiun da gestiun per udir sche la cumissiun da gestiun astga in summa rapportar per mauns dil cussegl da vischnaunca?

Presidenta dalla cumissiun da gestiun Sonia Lutz-Schmidt:

La cumissiun ha investa en tut ils protocols da suprastonza nua che las decisiuns da baghegiar vegnan medemamein protocolladas. Da tut temps sa la cumissiun seolver tiel president communal per retscheiver sclariments en detagl. Il pareri dalla cumissiun da gestiun va denton per mauns dalla suprastonza communal. La cumissiun ha buc il dretg da rapportar directamein al cussegl da vischnaunca ni alla publicitad.

President communal René Epp:

Pertuccont in eventual retardament dallas proceduras da baghegiar ni schizun da stuer suspender il menaschi entochen ch'il cass ei sclarius, sa buca vegnir rispundiu oz. Cheu basegna ei in sclariment en detagl digl uffeci da vischnauncas. La suprastonza communal sa sincerar che la comunicaziun enteifer ils caus d'uffeci baghegiar ed infrastruttura, gerau dil departament e president communal succeda jamnilmein.

Gerau Paul Flurin Schmidt:

Il resun dils commembers dalla cumissiun da baghegiar ei, ch'els giavischan dapli cumpetenzas che quei ch'els han actualmein. Quellas sa la suprastonza communal buca conceder dad ella anora. Cheu sa era ina cumissiun parlamentara buca meglierar enzatgei. En quei grau stuess il cussegl da vischnaunca instradar ina revisiun dalla constituziun communal.

Cussegl:

Che la cumissiun da gestiun astga buca rapportar per mauns dil cussegl da vischnaunca ei buc en uorden. Sche la suprastonza communal declara ch'il rapport dalla cumissiun da gestiun stat medemamein a disposiziun al cussegl, allura san ins desister d'instradar ina cumissiun parlamentara.

President communal René Epp:

La cumissiun da gestiun fa sia lavur independentamein cun rapportar a scret alla suprastonza communal. La suprastonza sa silsuenter rapportar ils resultats per mauns dil cussegl da vischnaunca. Ei vegn rendiu attent che caussas personalas che vegnan menziunadas el rapport ein buca previdas per la publicitad e vegnan era buca menziunadas enviers il cussegl.

Suenter las discussiuns retila cusseglier Edgar Durschei sia proposta cun la resalva d'instradar la via necessaria gest tenor resultats ad in cussegl futur.

Cussegl da vischnaunca Disentis/Mustér
La presidenta: L'actuara:

Helga Probst-Linder

Ursina Murer-Fatzer



Cussegl da vischnaunca 2021/2024

Protocol no. 27

Seduta dils 07-12-2023

4. Agenda 2024 (messadi 45-2021/2024)

Il president communal René Epp presenta l'agenda 2024. El aschunta gest il termin supplementar dils 16 da fevrer 2024 per in'ulteriura seduta da cussegl. Muort in'occurrènz vegn la seduta dils 3 da matg 2024 strieda. Las sedutas dil cussegl duein egl avegnir buca cuzzar pli ditg che las 22⁰⁰.

- Mardis, ils 23-01-2024
- **Venderdis, ils 16-02-2024**
- Mesjamna, ils 27-03-2024
- ~~Venderdis, ils 03-05-2024~~ ————— *Quen 2023*
- **Gievgia, ils 02-05-2023**
- Venderdis, ils 14-06-2024 *Plan da finanzas*
- Venderdis, ils 13-09-2024 *Preventiv 2025*
- Venderdis, ils 08-11-2024 *Seduta finala legislatura 2021/2024*
- Venderdis, ils 13-12-2024

Discussiun

Cussegl:

En in parlament eis ei legitim ch'ei vegn discussiunau e debattau. Per vegnir pli efficients duront cussegl eis ei impurtont che cusseglier(a)s sclareschan gia ordavon damondas e che las rispostas leutier vegnan communicadas als ulteriur(a)s cusseglier(a)s. Eventualmein fa ei era buca da basegns che la suprastanza communal pren tier mintga discussiun che occuora enteifer cusseglier(a)s il plaid.

Ei vegn constatau ch'ils termins ein buca vegni coordinai cul biro dil cussegl. Il giavisch ei da reparter las sedutas aschia ch'ei tucca buca adina cusseglier(a)s ord la medema uniu. Plinavon duei era vegnir risguardau ils termins dils pumpiers.

President communal René Epp:

La suprastanza vegn ad actualisar l'agenda 2024 e coordinar ils datums cul biro dil cussegl.

Il cussegl ha priu enconuschientscha dall'agenda 2024.

Cussegl da vischnaunca Disentis/Mustér
La presidenta: L'actuara:

Helga Probst-Linder

Ursina Murer-Fatzer



5. Ura da damondas (conform ad art. 44 dil regulativ da fatschentas)

Ei ha dau neginas damondas a scret sco era buc a bucca.

Communicaziuns

Geraua Jris Lombris:

En tut ils fatgs da siu departament duei vegnir teniu en la via da survetsch. Pliras gadas ei vegniu avon che cusseglier(a)s ein s'informai tier personas singulas ni instituziuns enstagl da sevolver directamein tier ella.

Mesjamna, ils 6 da december ha giu liug ina sera da film e discussiun davart la tematica violenza a casa. Deplorablamein ei la participaziun a quei referat staus schampers. Sulettamein treis mummas ed in student han priu part al referat. Gest en vesta alla discussiun davart in survetsch social en nossas scolas.

Quels dis ei il fegl sgulont cun la nova purschida d'in bus da notg dalla Regiun Surselva en collaboraziun cugl Auto da Posta arrivauus en las casadas. Igl ei legreivel che in e scadin sa far diever dil bus da notg duront las fins d'jamna. El vegn a cursar da Tujetsch enfin Cuera. Per quella nova purschida ein ils presidents communalis dalla Cadi s'engaschai grondamein. Cordial engraziament persuerter.

La suprastonza communalis ei avon dacuort s'entupada cun la giuventetgna da Mustér per in scomi da meinis. Era egl avegnir duei quei brat denter suprastonza e giuventetgna haver liug. Igl ei previu da s'entupar duas gadas ad onn.

Venderdis, ils 12 da schaner 2024, allas 19⁰⁰ ha liug en halla Cons la surdada dil Premi Desertina.

Presidenta dil cussegl Helga Probst-Linder:

- Dumengia, il 10 da december, ha liug la fiasta d'advent pils seniors, organisada dall'Uniun da dunnas Mustér;
- Dumengia, ils 17 da december, allas 16⁰⁰ ha liug en halla Cons il concert da Nadal da Las vuschs dil Rein. Suerter concert stiva da caffè;
- Sonda, ils 23 da december, allas 20⁰⁰ ha liug en baselgia Sogn Gions il concert da Nadal dalla Societad da musica Mustér;
- Gievgia, ils 28 da december, allas 20⁰⁰ ha liug en Sala Peter Kaiser, Claustra Mustér, il concert festiv per pasch e libertad sut la bitgetta da Simon Camartin. La prevendita ha liug tier la Papetaria Andrea, Mustér.

La proxima seduta dil cussegl da vischnaunca ha liug mardis, ils 23 da schaner 2024.

Cussegl da vischnaunca Disentis/Mustér
La presidenta: L'actuara:

Helga Probst-Linder

Ursina Murer-Fatzer



6. Elecziuns

6.1 dil president ni dalla presidenta dil cussegl da vischnaunca 2024

Cusseglie Edgar Durschei propona il vicepresident dil cussegl Ignaz Venzin sco niev president dil cussegl da vischnaunca 2024.

"Ignaz Venzin ei maridaus, bab da treis affons e habitescha cun sia famiglia dapi 2002 ad Acletta. Dapi 20 onns lavura Ignaz sco technicher da mesiraziun tier la Repower a Mustér ed a Glion. Ignaz ei dapi igl onn 2021 en uffeci sco cusseglie da vischnaunca ed ussa gest staus in onn vicepresident dil cussegl. El decuors dalla stad 2022 ha el organisau e priu en funcziun la gruppa da First-Responders en nossa vischnaunca. En siu temps liber ei Ignaz engaschus en las uniuns samaritanas da Mustér e Tujetsch sco era en uniuns culturalas, denter auter el Chor baselgia Segnas. En siu temps liber entaupen ins igl Ignaz tier spassegiadas ni igl unviern sin skis. Ignaz ha in bien dun da comunicar cuort, clar e precis. Jeu sundel perschuadius che Ignaz vegn ad ademplir igl uffeci sco president cun premura, bien maun ed engaschi cumplein".

Ulteriuras propostas ha ei dau neginas. L'elecziun succeda tenor scrutini.

Decisiun

Il cussegl elegia cun 14 vuschs vicepresident Ignaz Venzin sco president dil cussegl da vischnaunca pigl onn 2024.

Ei suonda il plaid dil nieveligiu president dil cussegl da vischnaunca Ignaz Venzin:

*"Preziau signur president dil cussegl
Preziadas concusseglieras e prezias concusseglies
Preziau signur president communal
Preziada suprastanza communal
Preziada cumissiun da gestiun
Preziau canzlist e prezias hosps*

Jeu engraziel a vus grondamein per quei bi segn da confidanza enviars mia persuna. Astgar tgamunar il cussegl ei ina gronda honur. Jeu vegnel ad exequir mia lavur tenor meglier saver e puder e cun il duiv respect. Per mei ein ils suandonts cavazzins impurtonts: comunicaziun, fidanza, sinceradad, trasparenza e respect. Igl ei impurtont d'acceptar il meini da l'auter. Medemamein sperel era da saver collaborar bein cun la suprastanza communal per saver prender bunas objectivas decisiuns en favur da nossa vischnaunca. In cordial engraziament admittel a mia famiglia per tut il sustegn e la capientscha per miu engaschi politic".

6.2 dil vicepresident ni dalla vicepresidenta dil cussegl da vischnaunca

Cusseglie Adrian Deflorin propona sco niev vicepresident dil cussegl, cusseglie Adrian Flepp.

"Jeu proponel concusseglie Adrian Flepp sco vicepresident dil cussegl da vischnaunca. Vus tuts enconuschis igl Adrian. El ei carschius si a Clavaniev e habitescha gia dapi entgins onns cun sia partenaria Livia gest sper scola. Adrian ha terminau il 2019 la scol'aula specialisada a Bienna sco technicher diplomau SSS ed ei dapi lu commember dalla direenziun e substitut dil meinafatschenta dalla Scrinaria Flepp SA. Avon 3 onns ei Adrian vegnius eligius cun in fetg bien resultat el cussegl da vischnaunca ed appartegn actualmein al biro da cussegl. Jeu schazegiel ses votums durant nossas discussiuns. Ils quals ein bein ponderai e cun coc. Era siu temps liber passenta Adrian tut tenor motto: "tut ord perschusiu". Adrian s'engascha cun tgierp ed olma pil club d'unihoc Desertina Bulls, il

qual el presidescha gia varga tschun onns. Sia gronda pissiun ei denton il fotografar. Forsa savein nus inagada gie contemplar sias fotografias all'exposiziun d'art a Segnas? Jeu sundel perschuadius che concusseglia Adrian Flepp vegn ad ademplir igl uffeci sco vicepresidente cun grond engaschi e supplicheschel vus da sustener sia candidatura".

Ulteriuras propostas ha ei dau neginas. L'elecziun succeda tenor scrutini.

Decisiun

Il cussegl elegia cun 14 vuschs cusseglier Adrian Flepp sco vicepresidente dil cussegl da vischnaunca pigl onn 2024.

Ei suonda il plaid dil nieveligi vicepresidente dil cussegl da vischnaunca Adrian Flepp:

"Preziau signur president dil cussegl

Preziadas concusseglieras e preziai concusseglers

Preziau signur president communal

Preziada suprastanza communal

Preziada cumissiun da gestiun

Preziau canzlist e preziai hosps

Jeu engraziel a vus per la confidonza demussada enviars mia ed admettel a collega Ignaz mias sinceras gratulaziuns per l'elecziun sco president dil cussegl da vischnaunca. Jeu giavischel ad el bien maun da tgamunar las sedutas e tut bien. Jeu selegrel sin la collaboraziun. Alla presidenta partenta Helga engraziel jeu per tut sia lavur ed il grond engaschi durant igl onn presidial sco era per la buna ed emperneivla collaboraziun el biro da cussegl".

La presidenta dil cussegl da vischnaunca Helga Probst-Linder admetta als nieveligi sinceras gratulaziuns ed ils megliers giavischs. Ella giavischa a tuts in bi temps d'advent e benedidas fiastas da Nadal ed in bien niev onn.

Cussegl da vischnaunca Disentis/Mustér
La presidenta: L'actuara:

Helga Probst-Linder

Ursina Murer-Fatzer

Disentis/Mustér, ils 10 da december 2023